



Maannakkut angajoqqaajunissamut piginnaasanik misissuisarnerni Kalaallit angajoqqaajusut kulturikkut oqaatsitigullu allaaqutit ilumut naammaginatsumik isiginiarneqartarnersut aammalu angajoqqaatut piginnaasanik nalilersuisarnermut kulturikkut qanimut periutsinik ineriartortitsisoqarsinnaaneraniq periarfissaqarnersooq ersarissaasoqarnissaa anguniarlugu Naalakkersuisut Rigsmyndighed attaveqarfignissaa pillugu Inatsisartut aalajangiiffignissaa siunnersuut.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Demokraatit Inatsisartunut ilaasortaataannut Anna Wangenheim-imut ersarissarmagu, suut tamarmik ajoraluartumik takutikkaat, Danmarkimi meeqqanut kalaallinut angajoqqaajusut immikkoortinneqartarnerat. Tamanna mamaalluinnarpoq.

Imaassinnaalluarpoq, angajoqqaanit kalaaliusunit imaluunniit angajoqqaamit kisimiitsumit meeqqap arsaarinnissutaanera Danmarkimit eqqortumik iliornerusuoq. Eqqortuunngisaannasoorli, tamanna angajoqqaajunissamut piginnaasanik misissuineq toqqammavigalu pisassasoq, danskit kulturiat danskillu oqaasii tunngavigalugit pissappat. Danmarkimiit iliuuseq tamanna kukkunerujussuuvoq, alianartumillu kinguneqarsimasinnaalluni, kalaallit meeqqat eqqunngitsumik angerlarsimaffiminniit arsaarinnissutaanerat. Suliaq ajorluinnarpoq.

Nassuerutigisariaqarparput, folketinngimi ilaasortat kalaallit sumiginnaaneranik tunngaveqartoq, eqqummaariffignissamangimassuk pikkoriffignagulu suliamut mamaatsumut iliuuseqarnissartik. IA aamma Siumut, folketinngimi Kalaallit Nunaat sinnerlugu issiatitalit, tamanna tunngavigalugu utoqqatsertariaqaraluarput uani suliami sumiginnaasimanerminnut.

Una Inatsisartunut ilaasortamit Anna Wangenheim-imit siunnersuutaasoq Inatsisartuniit minnerpaamik iliuuserisariaqarparput. Pingaaruteqarpoq, uagut Inatsisartuni ataatsimoorluta nunarsuarmi tamarmi kalaallit inuttut pisinnaatitaaffiniq illersuinissarput. Uanilu Danmarkimi.

Maluginiarparput, Naalakkersuisut allannguutissatut siunnersuuteqarsimasut. Taanna allannguutissatut siunnersuut ajunngilluinnarpoq. Demokraatit innersuussutigerusuppaat ataatsimiititaliap siunnersuut marluk tamaasa suliarissagai, allannguutitullu siunnersuuteqassaguni, siunnersuut marluk tamaasa inissaqartillugit.

Qujaqqillanga Inatsisartunut ilaasortamut Anna Wangenheim-imut siunnersuuteqarneranut.

Taamatut oqaaseqaateqarluta siunnersuutip akuerineqarnissaa innersuussutigalugu ataatsimiititaliami susassaqtumi suliareqqinneqarnissaa innersuussutigaarput.